

四庫全書

子部

欽定四庫全書

子部

格致鏡原卷七

七至

詳校官中書臣羅錦森

侍讀臣孫球覆勘

總校官中書臣朱鈐

校對官原任典簿臣郭祚熾

謄錄監生臣劉能

欽定四庫全書

格致鏡原卷七

大學士陳元龍撰

坤輿類三

石下

象形諸石——羅浮山記有大小石樓相去五里皆孤高峻秀邈出雲表重簷四柱宛如樓閣霞灼雲掩人迹罕到又有石如鞍橋在石樓之間望之高五十餘步謂之鐵橋水經注地理志曰大碣石山在右北平驪城縣

西南武帝嘗登之以望巨海而勒其石於此今枕海有石如甬道數十里當山頂有大石如柱形往往而立於巨海之中潮水大至及潮波退不動不沒不知深淺世名之天橋柱也韋昭亦指此以為碣石也 荊州記武陵舞陽縣有石帆若數百幅帆然 鄱陽記錢倉石在饒州石形如倉囤昔漁人夜宿石上忽見石開窺其中有錢取之盈艇因名 臨川記石廩其中可容千斛廩口開則歲儉閉則年豐也 續齊諧記吳興故鄣縣

東三十里有梅溪山山根直豎一石可高百餘丈至青而團如兩間屋大四面斗絕仰之於雲外無登陟之理其上復有盤石正員如車蓋恒轉如磨聲若風雨土人號為石磨轉駛則年豐遲則歲儉候之無差焉 東陽記崑崙山頂有一孤石可高三十丈其形似甌人謂之石甌 集仙錄華山玉女祠前有五石白號曰玉女洗頭盆其中水色碧綠澄澈雨不加溢旱不減耗 湘烟錄石魚嵒下有天絲石其形如甕以貯飛泉故上以石

甕為寺名 酉陽雜俎夷道縣有釜瀨其石大者如釜  
小者如斗形色亂真惟實中耳 孔靈符名山記會稽  
宛委山其上有石俗呼石簣壁立干雲有懸度之險禹  
躋此山發石簣得金簡玉書因之治水 宣室志捷為  
郡東十餘里有道觀在深巖中觀殿有石函長三尺餘  
其上鑿出鳥獸花卉文理纖妙鄰於鬼工而絨鏤極固  
泯然無毫縷之隙里人相傳云是尹希石函 零陵志  
石屏出零陵白鶴山屈處靜上昇之所紹興間有宗子

一日艤舟山下於水中得一石光彩絢異紋若峯巒聳秀渾然天成自是石工鑿取益衆其煙雲雪月之景波瀾龍鳳之象隱然可觀雖巧畫者莫臻其妙 南康記

郡西南有通天穴四壁石色如畫下有石牀 晉五行志洛陽宮西里石生地中高三尺如香爐槃薄不可掘

蜀王本紀蜀王為妃作塚蓋地數畝號曰武擔以石作鏡一枚表其墓其石今名為石笋 荊州記興安縣水邊有平石其上石櫛石履各一具俗云越王渡溪

脫履墮櫛於此 博物志桃林在弘農湖城縣休牛之  
山有石焉名曰帝臺之棋五色而文狀如鵲卵 珍玩  
考峻靈山側有石如棋子每取之即以紙錢拋神山之  
下所取不得揀選取畢視之黑白相均 北史魏時山  
崩得石角二藏在武庫 華山記山頂有石鼓嘗有聞  
其鳴者 清異志玄鍼子得石斧銘曰天雷斧速文步  
南康記處州石人山在泥水口近有三石形甚似人  
居中者為君左曰夫人右曰女郎 水經注鄆南千秋



亭壇廟之東枕道有兩石翁仲南北相對 臨川記靈  
谷東英巨山崑內有石人坐盤石上體生塵垢則生風  
溫潤則致雨晴日使舉體鮮明玉淨朗然 酉陽雜俎  
荊州永豐縣東鄉里有卧石長九尺六寸其形似人而  
舉體青黃隱起狀若雕刻境若旱使祭而舉之小舉小  
雨大舉大雨相傳此石忽見如此本長九尺今加六寸  
矣 洞微志汴都之南百里有周公墓前一石人能作  
怪人或遇之稱魯校書石押衙 戒菴漫筆圖山向江

一半舟行過者遠望石形紫裙烏髮儼然一老嫗人呼  
石婆婆 秘閣閒話熊山野好訪異物有石龜石桃石  
棗之類嘗夢人自云姓石相依附後得一石人長尺餘  
眉目皆具 漢書武帝作昆明池置二石人相對以象  
牽牛織女又刻石為鯨魚每雷雨魚常吼鬣尾皆動  
物原周宣王始置石鼓石人猊虎羊馬 劉馮事始漢  
霍去病門前始置石人馬及石獅等 集異志魏明帝  
青龍元年張掖柳谷口水溢涌寶石負圖狀象龜立於

川西有石馬七及鳳麟牛白虎犧璜玦八卦列宿孛彗之象又有文曰大討曹此晉之符命而於魏為妖 湘州記汝城縣有烏龍白馬山有黑石如龍白石如馬

一統志臨封縣西二十里石龍巖中有石如龍歲旱洗之即雨 事物紺珠石蛇出南海盤曲似蛇但無頭尾內空紅紫色 研北雜志南陽宗資墓旁石獸膊上有刻字曰天祿辟邪鮮于伯機少時曾至其地親見西門北門各有二獸但北門外者去資墓不遠故附會之大

軍圍襄陽時士卒多病瘧模天祿二字焚而吞之即愈  
人以為異然辟邪已壞矣 西京雜記青梧觀前有三  
梧桐樹樹下有石麒麟二枚刊其脇為文字是秦始皇  
驪山墓上物也頭高一丈三尺東邊者前左脚折折處  
有赤如血父老謂其有神皆含血屬筋焉 集異志至  
德二年昭陵石馬汗出昔周武帝克晉州有石象汗流  
濕地比其類也 異域志西南夷國山上有石駱駝腹  
下出水飲之令人身白淨 蜀記秦李冰為蜀太守立

石犀五頭以厭水精後轉為牛一在石牛門一在淵中  
廣州記鬱林郡山東南有池池有石牛歲旱百姓殺  
牛祈雨以牛血和泥泥石牛背祠畢天雨洗牛背泥盡  
即晴 晉書石季龍末洛陽城西北九重石牛在青石  
趺上忽鳴聲聞四十里季龍遣人打落兩耳及尾鐵釘  
釘四脚尋而季龍死 謝翱觀羊石記金華洞為黃初  
平叱石處石故在山之巔變怪抵牾宛然如羊形多為  
樵牧及好事者取去道士拾其餘蓄觀中卧者伏者抵

者蹶者履險而跋者倚而斲跪而乳者復有拱而人立者潯陽記廬山頂上有池中有三石鴈霜降則飛湘中記零陵有石燕得風雨則飛翔如真燕風雨止還為石倦遊錄謝鴻云向見高巖石上有如燕狀者石為烈日所暴忽有驟雨過往往墜地蓋寒熱相激而落非能飛也廬陵異物志開寶四年黔南上言江心有石魚見上有古記云廣德元年二月大江水退石魚見部民相傳豐稔之兆山川紀異涪州鑑湖上流有石

刻雙魚皆三十六鱗一銜萱草一銜蓮花魚見則年豐  
酉陽雜俎衡陽湘鄉縣有石魚山山石黑色理若生  
雌黃開發一重輒有魚形鱗鬣首尾有若畫焉長數寸  
燒之作魚腥 陸深金臺紀聞郿縣河灘上有亂石隨  
手碎之中有石魚長可二三寸天然鱗鬣或雙或隻不  
等云藏衣笥中能辟蠹魚 述異記海畔有大石龜俗  
云魯班所作夏則入海冬則復止于山上陸機詩云石  
龜常懷海我寧忘故鄉 酉陽雜俎臨邑縣北有燕公

墓碑碑尋失唯趺龜存焉石趙世比龜夜常負碑入水  
至曉方出其上常有萍藻有伺之者果見龜將入水因  
叫呼龜乃走墜折碑焉 集仙錄明星玉女者居華山  
服玉漿白日昇天山頂石龜其廣數畝高三仞 七修  
類藁南京紫金山即古之鍾山蔣山也太祖陵寢在焉  
葬之時掘土數尺見一石龜頸長數寸首足口目皆具  
今藏於太廟久晴而腹下有水則雨久雨而腹下乾則  
晴其異如此 方洲雜言家藏石蟹一枚具體如生以



水磨之腥氣如蟹病目者稍塗兩眥頗能定痛 張又  
新水記峽州扇子峽石中突而洩水獨清冷石狀如蝦  
蟬頭俗謂蝦蟬石 事物紺珠石蠶生海岸石旁 洽  
聞記永昌年中台州司馬孟詵奏臨海水下馮義得石  
連理樹三株皆白石 華夷珍玩考石梅生海中一叢  
數枝橫斜瘦硬形色真枯梅也雖巧工造作所不能及  
根所附著如覆菌或云本質為海水所化如石蟹石蝦  
之類又石柏生海中一幹極細上有一葉宛是側柏扶

疎無小異根所附著如烏藥 錦繡萬花谷華陽風俗  
記云蜀有石筍天地植之以鎮海眼動則江濤大溢又  
杜詩註云成都記石笋及林亭池石之地雨過必有小  
珠或青黃如粟者亦有細孔可以貫絲又云石筍在衙  
西門外僅百五十步二株雙蹲一南一北北笋長一丈  
六尺圍極於九尺五寸南筍長一丈三尺圍極於一丈  
二尺南筍蓋公孫述時折故長不逮北筍

異石 拾遺記周靈王時異方貢石鏡此石色白如月

照人面如雪謂之月鏡又方丈山西有照石去石十里  
視人物之影如鏡焉碎石片片皆能照人而質方一丈  
則重一兩昭王春此石為泥泥通霞之臺 洞冥記元  
鼎五年郅支國貢馬肝石百斤常以水銀養之內玉櫃  
中金泥封其上色半青半白如今之馬肝春碎以和九  
轉之丹服之彌年不饑渴也以之拂髮白者皆黑帝坐  
羣臣於甘泉殿有髮白者以石拂之應手皆黑是時公  
卿語曰不用作方伯惟須馬肝石此石酷烈不和丹砂

不可近髮 拾遺記李夫人死武帝常思夢欲一見之  
李少君言能致其神啓帝曰黑海北對都之野出潛英  
之石其色青輕如毛羽寒盛則石溫暑盛則石冷刻為  
人像神語不異真人乃求得之命工刻作夫人形置之  
幙裏宛若生時帝大悅欲近之少君曰此石毒可望不  
可迫也 西京雜記五鹿充宗受學於弘成子成子少  
時嘗有人過已授以文石大如鷺卵成子吞之遂大明  
悟為天下通儒成子後病吐出此石以授充宗充宗又

為碩學也 西京雜記元后在家嘗有白鷺銜白石大如指墜后續筐中后取之石自剖為二其中有文曰母天地后乃合之遂復還合乃寶錄焉後為皇后常并置璽笥中謂為天璽也 梁四公記天目山人全文猛於新豐後湖觀音寺西岸獲一五色石大如斗文彩盤蹙如有夜光文猛以為神異抱獻之梁武命置於太極殿側將年餘石忽光照廊廡有聲如雷帝以為不祥召杰公示之對曰此上界化生龍之石也非人間物若以洛

水赤螭石和酒合藥煮之百餘沸柔軟可食琢以為飲食之器令人延壽有聲者龍欲取之帝令馳取赤石如其法琢之以為甌各容五斗之半以盛御饌香美殊常以其餘屑置舊處忽有赤龍揚鬚鼓鬣掉尾入殿擁石騰躍而去帝遣推驗乃是普通二年始平郡石鼓村鬪龍所競之石其甌遭侯景之亂不知所之 廣艷異編 唐時有魏生者於虔州界砂磧中得石片如手掌大狀如甃片紋類如石半青半赤有賈胡以千萬易之曰此

寶母也但每月望設壇海岸祭之以此致壇工一夕明珠寶貝等皆自聚故名寶母北憲災輟有人曾畜一石胡人以十萬購之其人與之而詰其異胡人令取盆水置石其中視中有一馬現石中狀如飛動其人問其所用曰此龍駒石也以水浸之飲馬馬輒生龍駒無價寶也稽神錄石千牛兵曹王文秉之祖嘗采碑於積石下得一自然員石如毬形式如礮斲乃重疊如殼相包斲之至盡其大如拳復破之中有一蠶如螭螭蠕蠕

能動人不能識因棄之後與鄉人夜會語及青蚨還錢  
事或云人欲求富莫如得石中金蠶畜之則寶貨自致  
矣問其形狀則石中蟻螭也 異苑永康王曠井上有  
一洗澣石時見赤氣後有胡人寄宿忽求買之未及度  
錢子婦孫氏覩二黃鳥闕於石工疾往掩取變成黃金  
胡人不知索市愈急既得撞破石內正空二鳥處 夷  
堅續志宋宮有靈鵲石石中有鵲每天將曉聞其噪聲  
宋南渡得之晉州又分寧陳甫山莊有槌藁石陳夜步



月忽聞雞鳴於石上即而視之不見移石於數步外至  
次宿鳴如故復移石以歸置之月下雞必鳴其子剖視  
之中有雌雄二雞文采可觀 酉陽雜俎常侍崔元亮  
在洛中嘗閒步涉岸得一石子大如雞卵黑潤可愛玩  
之行一里劃然而破有鳥大如巧婦飛去 影燈記上  
元夜蕭餘於宣陽里酒盤下得一物如人眼睛其體類  
美石光影射人每置掌中遊閣處輒光明三尺許後因  
雨遂飛去 錦繡萬花谷卞山在湖州山下有老母拾

得一丈石光彩可玩偶墜火中異香聞於遠近收而寶之每投火中異香如初 魯應龍括異志有人得青石大如磚背有鼻穿鐵索長數丈循環無相斷處海商見之以數十千易之云此協金石投於海中經夕引出上必有金 拾遺記員嶠山西有星池出爛石常浮於水色紅質虛似肺燒之香聞數百里烟氣升天則成香雲雲徧則成香雨 物類相感志消石出鳥場國能消金石為水服之悉得長生其石出處氣極穢惡飛鳥不能

過其上人或單服從過身上諸蟲悉化為水而得長生  
矣形若鷲毛管者佳仙方云北帝玄珠也 錄異記新  
北市是景雲觀舊基有一巨石大如柱礎人或坐之蹋  
之逡巡如火燒應心煩熱因便成疾往往致死或云若  
聚火燒此石吼卽瞿塘山吼而大沸 水經注崦嵫山  
有石赤白色以兩石相打則水潤打之不已潤盡則火  
出山石皆然炎起數丈逕日不滅有大黑風自流沙出  
奄之乃滅其石如初 彙苑詳註日林國西南有怪石

方數百里光明澄澈可鑒人五臟六腑謂之仙人鏡其  
國人有疾輒照之遂知其形 珍珠船明月山在醴陵  
縣上有白石狀如明月照農夜耕後有勅鑿下見在本  
州明月池上

化石 淮南子禹治洪水經轅轅嶺化為熊謂塗山氏  
曰欲餉聞鼓聲乃來禹跳石誤中其鼓塗山氏來見禹  
方作熊慚之而去至嵩高下化為石禹曰歸我子石破  
而生啓 蜀記梓潼縣有五婦山昔秦遺蜀五美人蜀

遣五丁迎之至此五丁踏地大呼五女皆化為石 郡  
國志儋州湖化昌明山山有二石如人形云有兄弟二  
人向海捕魚因化為石號曰兄弟石人 周地圖記昔  
有夫妻二人將兒入山獵其父落崖妻子將下救之竝  
變為三石因以為人石 東坡集南中有人採石石陷  
壓閉石罅中幸不死餓甚只取石膏食之不知幾年後  
他人復採石見此人引之出漸覺身硬纔見風便化為  
石又武昌山有婦望夫不歸身化為石 述異記秦二

世元年宮中雨金頃刻皆化為石 搜神記張顥為梁  
相有鳥如山鵲飛翔入市市人擲之墮地化為圓石顥  
椎破之得金印文曰忠孝侯印 廣博物志仙人琴高  
聞仙公得道自東海跨雙鯉來訪仙公與之酣飲既醉  
高卧白雲間酒醒雙鯉化為石矣仙公乃以雙鶴贈之  
跨之而還石至今存 述異記范文本日南奴也為奴  
時牧羊於澗中得兩鯉魚欲私食之郎知詰文詐云將  
礪石還非魚也郎至魚所果見兩石文異之石有鐵文

因入山中就冶作兩刀因舉刀向鄣鄣即蕃中山地名也呪曰斫石鄣破者文當治此國遂斫破之衆遂推為君拾遺記崑崙山有螭潭潭左側有五色石云是白螭之腸化為石悅生隨抄嘗見龍頸骨中髓皆是白石虎目光落地亦成白石星光氣也落則成石松亦成石蛇蟬蠶皆成石倦游雜錄通遠軍古得州地有水蟲類魚鳴作覓覓聲見者以挺刃擊之或化為石可以為礪石名曰覓石長尺餘兵刃經其磨者刃光而不鏃

亦奇物也 唐書僕骨東北一千里有康于河投松木入水一二年乃化為石其色青謂之康于石有松文

錄異記婺州永康縣山亭中有枯松樹因斷之悞墮水中化為石取未化者試於水中隨亦化焉其所化者枝幹及皮與松無異且堅勁有未化者數段相兼留之以旌異物 遊名山記新安之王喬洞在縣西二十里洞之石皆土所成取而破之木葉之形交錯其間文理具在若雕刻者不特一石為然衆石皆然洞之上二木亦



皆化石而一木復產枝葉 偃曝談餘天寶中李應物  
開砥柱石中得古鐵犂鐮有平陸字因改為平陸縣見  
天寶傳信錄夏侯孜開貞陵於堅石中得金釵半股其  
長如掌餘尚銜石中見唐史闕又東觀餘論潯陽役兵  
鑿一石石中又有小石若碑版視之乃王逸少書頭眩  
方可異也黃長睿謂埋沒既久土或變石故是刻入於  
石中了不足怪正如琥珀內蟻蟲水晶內桃花片耳  
郡邑志黔中郡南石崖屹立傍有石洞數丈相傳諸葛

亮征九溪蠻嘗過此畱宿洞中設一牀懸粟一握以秣馬後遂化為石牀石粟至今猶存 大士傳其飼虎之餘飯棄擲林間化為石青白錯雜可作數珠謂之飯石至今長存

石異 左傳僖十六年春隕石於宋五 述異記魏武帝末年鄴中雨五色石 北史隋開皇時隕石於武安滏陽間十餘里 法苑珠林唐貞觀十八年十月文水縣天大雷震雲中落一石下大如碓背脊高腹平縣丞

張孝靜奏時有西域摩伽陀菩提寺長年師到西京頗  
持博識勅問之是龍食二龍相爭故落下耳 朝野僉  
載寶曆元年資州資陽縣清弓村山有大石可三間屋  
大忽然吼踴下山越澗却上坡可百步其石走時有鋤  
禾人見之各手把鋤趣至所止其石高二丈 稽神錄  
發源縣有大黃石自山墜於谿側瑩徹可愛羣犬見而  
競吠之數日村人不堪其喧乃相與推致水中犬又俯  
水而吠愈急取而碎之犬乃不吠 曲洧舊聞秘魔巖

靈跡甚多嘗有飛石入厠度其石之尺寸則大於戶不知從何而入也僧有不被袈裟而登巖者則必有石落中路或飛石過耳如箭聲人皆恐怖 廣博物志舜時十有一月巡狩北嶽詣大茂山谷值大雪不能進而遙祭之忽廟之右飛一石冉冉而墜帝前名曰安王石又五載巡狩其石飛於曲陽建廟祀之 左傳昭八年石言於晉魏榆平公問師曠曰石何故言對曰石不能言或馮焉不然民聽濫也臣聞作事不時怨譴動於民則

有非言之物而言今宮室崇侈怨讟並作石言不亦宜乎晉書石言於陝若言勿東也趙州志光武夜至趙州南迷路聞人語問之勿應見二人立傍怒拔劍斬之其一急走熟視之乃石也鄴中記貴溪許先之得一石高闊三尺宛如酒家壁上所畫仙醉後奮袖坐舞之狀行宿者常遇一偉丈夫舞躍不已燭火追視即此石也五雜組明弘治間慶陽天雨石子大如鵝卵小如雞頭皆作人言事物紺珠唐玄宗時龍池聖德頌

石鳴其音清遠如鐘磬穆宗時華岳碑有聲聞數里浹旬乃止南史梁大同元年春曲阿縣建陵隧口石辟邪起舞大業拾遺大業七年二月初造釣臺之時運石者將船至江東岸山下取石累構為釣臺之基忽有大石牛十餘自山頂飛下直入船內如人安置船無傷損神仙傳黃初平年十五家使牧羊四十餘年不歸其兄初起索初平相見語畢問羊何在曰在山東兄往視但見白石不見羊初平曰羊在耳兄自不見初平乃

往叱羊起於是白石皆起成羊數萬頭 幽明錄陽羨  
小吏吳龕乘掘頭船過溪獲五色浮石取之乃變為女  
自稱是河伯女 隋志開皇末高祖於宮中埋二小石  
於地以誌置牀之所未幾變為玉 唐會要太和四年  
雲蔚代三州山谷間石化為麵人取食之 酉陽雜俎  
臨江有一寺寺前漁釣所聚有漁子下網舉之覺重壞  
網視之有石如拳因乞寺僧置於佛殿中石遂長不已  
經年重四十斤 錄異記天復中洪州賈石於越王山

下昭仙觀前長七八尺圍三丈餘青碧如玉節度使劉  
威命舁入觀內設齋祈謝七日之內稍小長三尺數日  
石長尺餘今只有七八寸畱在觀內 崔鴻後趙錄途  
中有大石二丈許自立石勒命斷之有魚羊之文於是  
字玄羊 唐書貞觀十七年涼州鴻池谷有五石青質  
白文成字凡八十八字 事物紺珠宋太宗時夾江有  
二石皆黝質赤文隱起成字一曰君王萬歲一曰趙二  
十一帝徽宗時晉州一綠石方三尺餘當中有堯天正



瑞字 宋史建炎三年鼎州巨石隨大水流下有字曰  
無為大道天知人情無為冥窈神見人形心言意語鬼  
聞人聲犯禁滿盈地收人魂

格致鏡原卷七

欽定四庫全書

格致鏡原卷八

大學士陳元龍撰

坤輿類

四

水附冰

總論 逸雅水準也準平物也 黃帝書天在地外水  
在天外水浮天而載地者也 管子水者地之血氣如  
筋脉之通流者也 春秋元命苞水之為言演也陰化  
淖濡流施潛行也故其立字兩人交一以中出者為水

一者數之始兩人譬男女之陰陽交物以一起也物  
理論所以立天地者水也夫水也者本也吐元氣發日  
月經星辰而興管子夫水淖弱以清而好灑人之惡  
仁也視之黑而白精也量之不可使概至滿而止正也  
唯無不流至平而止義也人皆赴高已獨赴下卑也卑  
也者道之室王者之器也而水以為都居瑞應圖共  
工氏受水瑞百官師長以水為號蒙水瑞水也君乘土  
而王其政太平則蒙水出於山焉洪範水曰潤下潤

下作醎疏水性本甘久浸其地變而為鹵鹵味乃醎

淮南子方諸見月則津而為水高誘注方諸陰燧大蛤也熟摩拭令熱以向月則水生也許慎注諸珠也方石也以銅盤受之下水數升 禮記祭宗廟水曰清滌

海錄碎事水黑曰盧不流曰奴 爾雅水決之澤為汧

決復入為汜大波為瀾小波為淪直波為徑水注川曰

谿注谿曰谷注谷曰溝注溝曰澮注澮曰瀆 左傳注

傳水曰汪 管子水之出於山而流入於海者曰經水

水別於他水入於大水及海者曰枝水山之溝一有水  
一無水者曰谷水水之出於他水溝流於大水及海者  
曰川水出地而不流者曰淵水 列子鯢桓之潘為淵  
止水流水濫水沃水汎水雍水汧水肥水之潘皆為淵  
是為九淵

潘作蟠水  
之盤回處

郭璞爾雅注河東汾陰縣有水

口如車輪許漬沸涌出其深無限名之曰漢馮翊郃陽  
縣復有漢亦如之相去數里而夾河河中階上又有一  
漢漢源皆潛相通在汾陰者人壅其流以為陂種稻呼

其本出處為漢魁 白虎通湖都也流瀆四面所限都也 春秋說題辭洛之為言繹也言水繹繹光耀也渭之為言布也渭渭流行貌 陸游入蜀記土人謂山間之流通江者曰瀼 王穉登客越志鑿而濬之曰陂疏而導之曰渠障而高之曰堰隄而石之曰硤樞而運舟曰壩以時停決曰閘 楊慎外集水行沙上曰瀨水出尾下曰瀆回流旋轉曰漩石積水淺曰磧水疾崖傾曰碛灘磧相湊曰杼音水如轉轂曰漕水漫不流曰沱潭

下急流曰灘 毛詩傳風行水上成文曰漣 五雜俎

吳興水多於山間暴下其色殷紅禾苗浸者盡死謂之

發洪 爾雅水醮曰辱

音軌

邢疏醮盡也凡水之盡皆曰

辱猶竭涸也 梁李膺益州記蜀灌縣離堆山關雞臺

下塹鑿石崖尺為之畫凡十有一謂之水則水及其九

則民喜盡沒其則民困乃秦蜀守李冰所為又教民檢

江立堰之法曰深淘灘淺則堰 田家五行正月十旬

十二日秤水以卜十二月之水旱專取一瓦餅每朝取



水秤重則雨多輕則雨少 研北雜志揚子江中沙田  
田戶每歲旦取一甌以稱水水重則是年江水大輕則  
水小歲歲不差 演繁露世傳水之好者比他水升斗  
同而銖兩多故宣州漏水有秤為此也杜牧罪言曰幽  
并二州程其水土與河南等常重十二 宋彥山行雜  
記西湖水每合計重三兩山間井水每合重二兩八錢  
五分湖水澹微甘山間水則甘而冽耳 田藝衡煮泉  
小品有黃金處水必清有明珠處水必媚有子鮒處水

必腥腐有蛟龍處水必洞黑嫩惡不可不辨也移水取  
石子置餅中雖養其味亦可澄水令之不淆 博物志  
酒泉延壽縣南有山石出泉注地為溝其水有肥如煮  
肉洎羹羹永永如凝膏燃之極明不可食縣人謂之石  
漆 酉陽雜俎高奴縣石脂水水膩浮水上如漆採以  
膏車及燃燈極明 本草綱目溝澗流水中水面如油  
色似黃金甚腥烈名地溲冬月收取以柔鐵燒赤投之  
二三次剛可切玉 抱朴子或問涉江渡海辟龍蛇之

道抱朴子曰道士不得已而當游涉大川者皆先當於  
水次破雞子一枚以少許粉雜香末合攪器中水以自  
洗濯則不畏風波蛟龍也又佩東海小童子符及制水  
符蓬萊札皆却水中之百害也天文大字有北帝書寫  
帛而帶之亦辟風波蛟龍水蟲也 王氏神仙傳王玄  
芝夜見一道士因隨之行在西江水底月光中不見泥  
沙水隨自開路傍一物如龍又如蛇長十丈許道士曰  
此水母也見者長生 白澤圖水之精曰罔象狀如小

兒赤目黑色大耳長爪縛烹之吉 物類相感志水百年不流者其精名擢狀如人人得而食之有力

四瀆 風俗通江淮河濟為四瀆瀆通也所以通中國垢濁 通典天寶六載封江瀆為廣源公淮瀆為長源

公河瀆為靈源公濟瀆為清源公 淮南地形訓江出岷山河出崑崙濟出王屋潁出少室漢出嶓冢分流外馳注於東海 風俗通江者貢也為其出珍物可貢獻也 釋名江者公也小水流入其中出物不私所公共

也 徐鉉說文解字江出岷山至楚都名南江至潯陽

為九道名中江至南徐州名北江入海 徐堅初學記

凡長江之別有郛江

亦曰涪江亦曰渝水在蜀

汶江墊江

至巴郡入大江弱

柳江

西江別支

浙江

發源東陽新安之間

松江

自吳入海

京江瓜步江烏江

曲江 廣雅江神謂之奇相 陸深蜀都雜抄岷嶓潛

沱之義難解今蜀山連綿延亘凡居左者皆曰岷右者

皆曰嶓凡水出於岷者皆曰江出於嶓者皆曰漢江別

流而復合者皆曰沱漢別流而復合者皆曰潛恐屬方

言爾 水經注淮水出南陽桐栢山其源初出湧出復  
潛流 釋名淮園也園繞揚州北界東至海 古嶽瀆  
經淮水神名曰無支祁形猶獼猴力踰九象禹令庚辰  
制之鎖於龜山之足淮水乃安 京房易傳河者經天  
亘地之水 穆天子傳河者四瀆之宗 孝經援神契  
黃河者水之伯上應天河 淮南子河水出崑崙東北  
防貫渤海入禹所導積石山 漢書河有兩源一出蔥  
嶺一出于闐 山海經崑崙山有青河白河赤河黑河

環其墟 爾雅河出崑崙虛色白所渠并千七百一川

色黃百里一小曲千里一曲一直邢疏言河源初出水

色白至其所受之渠并計凡有一千七百沙壤混淆故

為一川而水色黃也 大藏西域記阿耨達池

華言無煩惱似

指所謂星宿海者

在香山之南大雪山北周八百里東南流入

海者曰殄加河

華言天堂

西南流入海者曰縛芻河

華言青

西

北流入海者曰徙多河

華言冷

又潛流地下出積石山東

北流入海者為中國之河源 初學記初禹自黎陽東

北界分河為二渠以引水一南出會隰川今河所流也  
一出貝丘即九河之上河王莽時廢塞故俗謂之王莽  
河隋煬帝于衛縣因淇水之入河立淇門以通河東北  
行得禹九河之故道隋人謂之御河 河圖象緯河導  
崑崙山名地首上為權勢星一曲也東流千里至規其  
山名地契上為距樓星二曲也邠南千里至積石山名  
地肩上為別符星三曲也邠南千里入隴首間抵龍門  
首名地根上為營室星四曲也南流千里抵龍首至卷



重山名地咽上為卷舌星五曲也東流貫砥柱觸關流  
山名地喉上為樞星以運七政六曲也西距卷重三千  
里東至雒會名地神上為紀星七曲也東流至大岨山  
名地肱上為輔星八曲也東流過絳水千里至大陸名  
地腹上為虛星九曲也 潘昂霄河源志黃河九折胡  
地有二折蓋乞兒馬出反必赤里也 水衡記黃河十  
二月各有水名正月名凌解水二月三月名桃花水四  
月名麥黃水五月名瓜蔓水六月名礬山水七月八月

名荻苗水九月名登高水十月名復槽水十一月十二

月名覺凌水

九州記二月白蘋水七月豆花水九月霜降水十一月走凌水餘同

易乾

鑿度帝王將起河水先清清變白白變赤赤變黑黑變

黃各三日也 呂氏春秋秦滅六國自以為獲水德之

瑞更名河曰德水 昨夢錄黃河漲溢民於無事時取

長藤為絡若今之竹夫人狀其長大則數百倍也實以

芻藁土石大小不等謂之卷埽每量水之高下而用之

大者至於二十人方能推之於水正決時亦能遏水勢

之暴又有絞藤為繩綴結竹蔑筏木柵等謂之寸金藤  
有時不能勝水力即寸斷如剪 河東記馮六郎名夷  
即河伯軒轅天子之愛子也馮水官也水成數六耳  
水經注濟水出河東垣縣王屋山初名流水東出溫縣  
西北始名濟水 唐會要帝問許敬宗曰濟甚細而在  
四瀆何哉對曰瀆之言獨也不因餘水獨能赴海者也  
濟水潛流而屢絕狀雖細微其實尊也

諸水 淮南子孟春之月天子服八風水注取銅露盤

中露水八方風所吹也又云八方風至浚井取新泉四時皆服之非獨春也陸深玉堂漫筆扁鵲傳飲以上池之水工池水竹木上未到地水四時纂要立春貯水謂之神水釀酒不壞漢書溝洫志來春桃華水盛師古注月令仲春之月始雨水桃華蓋桃方華時既有雨水山谷冰泮泉流猥集波瀾盛長故謂之桃華水陸羽茶經凡水品山水上江次井水下山水乳泉石池漫流者上瀑湧湍瀨食久令人頸疾江水取去人遠

者井取汲多者 張又新煎茶水記故刑部侍郎劉伯  
芻較水之與茶宜者凡七等揚子江南冷水第一無錫  
惠山寺石水第二蘇州虎丘寺石水第三丹陽縣觀音  
寺水第四揚州大明寺水第五吳松江水第六淮水最  
下第七又陸鴻漸曰楚水第一晉水最下李季卿因命  
筆口授而次第之廬山康王谷水簾水第一無錫惠山  
寺石泉第二蘄州蘭溪石下水第三峽州扇子山下有  
石突然洩水獨清冷狀如龜形俗云蝦蟆口水第四廬

山招賢寺下方橋潭水第六揚子江南冷水第七洪州

西山西東瀑布水第八唐州栢巖縣淮水源第九

淮水亦佳

廬州龍池山顧水第十丹陽縣觀音寺水第十一揚州

大明寺水第十二漢江金州上游中零水第十三

水苦歸

州玉虛洞下香溪水第十四商州武關西洛水第十五

未嘗泥

吳松江水第十六天台山西南峯千丈瀑布水第

十七郴州圓泉水第十八桐廬嚴陵灘水第十九雪水

第二十

用雪不可太冷

國史補凡物有水水由土地故江東

宜綾紗宜紙鏡水故也蜀人織錦初成必濯于江水然後文彩煥發鄭人滎水釀酒近邑水重斤兩與遠郊數倍淮南子汾水濛濁而宜麻濟水通和而宜麥河水  
中濁而宜菽雒水輕利而宜禾渭水多力而宜黍漢水  
重安而宜竹江水肥仁而宜稻山海經汜天之山赤  
水窮焉不姜之山黑水窮焉殄塗之山青水窮焉白水  
之山白水出焉不庭之山滎水窮焉成山甘水窮焉  
淮南子白水宜玉黑水宜砥砥卓青水宜碧赤水宜丹

黃水宜金清水宜龜 楚辭遵赤水而容與注赤水出崑崙山 名山記僧權道人居晉安霍山見白水異常飲之甘如醴 山堂肆考白水源出肅州衛城西南二十里下流與紅水黑水合紅水源出肅州衛城東南山谷中下流與黑白水合 唐書高麗國有馬訾水出靺鞨之白山色若鴨頭號鴨綠水 筆談南荒有黑溪水鄆州界有烏脚溪涉者足皆如墨 珍玩續考解州鹽澤方百二十里久雨西山之水悉注其中未嘗溢大旱



未嘗涸澍色正赤在版泉之下俚俗謂之蚩尤血 山  
海經高前之山其上有水焉甚寒而清帝臺之漿也飲  
之者不心痛 水經注鹽道山孤標秀出清泉灌頂世  
所謂鵞漿也發於上而潛於下矣 列子禹治水土迷  
之一國無風雨霧露不生鳥獸有山名壺領頂有口若  
圓環名曰滋穴有水湧出名曰神瀉臭過椒蘭味過醪  
醴 述異記甜水去虞淵八十里有甜溪水味如蜜東  
方朔遊此得水數斛以獻帝投水於井井水常甜而寒

洗沐則肌理柔滑 述異記灘渙二水波若五色有文章故名繪水 南雍州記筑陽縣粉水源出房陵取其水為粉鮮潔異於餘水或云蕭何夫人漬粉處也 述異記吳故宮有香水溪俗云西施浴處人呼為脂粉塘 吳王宮人濯粧於此溪上源至今猶香 高僧傳四月八日以五香水灌佛頂都梁香為青色水鬱金香為赤色水丘隆香為白色水附子香為黃色水安息香為黑色水 方輿勝覽梁天監中有胡僧曇隱寓錫於蔣山

山中乏水時有麗眉叟相謂曰予山龍也知師渴飲措之無難俄而沼沸出後有西僧繼至云本西域八池已失其一似竭彼盈此也其泉一清二冷三香四柔五甘六淨七不饑八蠲疴名八功德水自梁以來皆取給御府曰飲之可以愈疾方輿記蜀青城有延慶宮西有常道觀其南有六時水六時灑水以代刻漏於陽時即灑然而下陰時無晝夜凡六時灑水故名六時水也水經注魯國卞縣東南有姚虛虛東有漏澤水有盈漏

漏則數夕之中傾陂竭澤矣左右民居識其將漏預以木為曲牀約鄆穴口魚鼈異鱗不可勝載博物志庭州灞水以金銀鐵器盛之皆漏惟瓠葉則不漏路史西海島間水如脂而黑他物盛之皆滴漏惟牛角可貯杜陽編滄州久視山下出澄綠水其泉闊一百步亦謂流綠渠雖投之金石終不沉沒故州人以瓦鐵為船舫柳子厚愚溪對西海之山有弱水散渙無力不能負一羽投之委靡墊溺及底而後止新唐書婆羅門

諸國有畔茶怯水出山石臼中能銷草木金鐵人手探  
入輒爛以橐駝髑髏轉注瓠中 裴氏廣州記百管谿  
周迴丈餘水極沸涌如猛火煎油聲 錦繡萬花谷季  
子廟前有沸潭生物投之即熟 拾遺記岱輿山有員  
淵千里常沸騰以金石投之則爛如土矣 拾遺記西  
海之西有浮玉山山下有巨穴中有水其色若火晝則  
通曉不明夜則照耀穴外雖波濤灌蕩其光不滅 水  
經注山陰縣西四十里有二谿東谿廣一丈九尺冬暖

夏冷西谿廣三丈五尺冬冷夏暖二谿北出行三里至徐村合成一谿廣五丈餘而溫涼不雜

泉 爾雅泉一見一否為瀝濫泉正出正出涌出也

與濫

檻沃泉縣出縣出下出也沃泉穴出穴出反出也 公

羊傳瀆泉直泉也直泉者湧泉也 逸雅濫泉濫銜也

如人口有所銜口閤則見也沃泉水從上而下有所灌

沃也沃泉沃軌也流狹而長如車軌也所出同所歸異

曰淝泉 太平清話山頂泉輕而清山下泉清而重石

中泉清而甘沙中泉清而冽土中泉清而厚流動者良  
於安靜負陰者勝於向陽山削者泉寡山秀者有神真  
源無味真水無香 煮泉小品山厚者泉厚山奇者泉  
奇山清者泉清山幽者泉幽皆佳品也不厚則薄不奇  
則蠢不清則濁不幽則喧必無佳泉泉往往有伏流沙  
土中者挹之不竭即可食不然則滲豬之潦耳雖清勿  
食凡源泉必重而泉之佳者尤重餘杭徐隱翁嘗言以  
鳳凰山泉較阿母墩百花泉便不及五錢 禮稽命徵

王者得禮之制則澤谷之中白泉出飲之壽長 瑞應  
圖醴泉者水之精也味甘如醴泉出流所及草木皆茂  
法苑珠林太山之東有醴泉其形如井本體是石也  
欲取飲者皆洗心跪而挹之則泉出如流多少足用若  
或污慢則泉縮焉蓋神明之異常者也 蔣氏日錄顧  
渚湧金泉每歲造茶時太守先祭拜然後水漸出造貢  
茶畢水漸減至供堂茶畢已減半矣太守茶畢遂涸又  
名金沙泉 玄中記強村有水方寸許人欲取之唱浪



淘沙一曲即得一杯味大甘冷因名樂音泉 寰宇記

安豐軍泉在淨戒寺北人至泉旁大叫則大涌小叫則小涌吐之涌愈甚 張僧鑒潯陽記雞籠山下澗中有

數十處累石若有人功水常深尺餘朝夕輒有湧泉溢出如潮水時刻不差朔望尤大號為潮泉常如沸湯

伏琛齊地記安丘城南三十里電都泉其電或出或否亦不為災異 水經注南湘陂村有圓水圓廣可二百步一邊暖一邊冷冷處極清綠淺則見石深則無底暖

處水白且濁玄素既殊涼暖亦異厥名除泉其猶江乘  
之半湯泉也 湘山野錄齊州城西有金線泉澄徹見  
底池心南北有金線一道微起水面以油滴之則線文  
還去或以杖亂之則線輒不見水止如故天陰亦不見  
抱朴子崑崙及蓬萊其上鳥獸飲玉泉皆長生不死  
也 物類相感志西北荒有玉饋酒泉注焉廣深一丈  
人飲此酒美如玉飲一樽復取一樽與天地同休 水  
經注有龍泉出允街谷泉眼之中水文成蛟龍或試撓

破之尋平成龍畜生將飲者皆畏避而走謂之龍泉

物類相感志陽泉大餘山北清流數十步所涵草木皆  
化為石精明堅勁扣之如磬珮之有聲其水所經之處  
物皆漬為石水飲之得人壽石得之除人瘡 彙苑詳  
註南劍州天陷山有乳泉飲之登山嶺如飛 括地圖

負丘之山上有赤泉飲之不老神宮有英泉飲之眠三  
百歲乃覺不知死 寰宇記蜀武陽有聖泉其水碧色  
患瘡疾者洗之多愈投銀即成金色孕婦飲之墮胎俗

以為聖泉 白居易六帖 晉廣州石門有貪泉 南史  
袁粲曰昔一國有狂泉飲之無不狂國君穿井而飲獨  
得無恙國人反謂國君為狂火艾針藥畢具君不任其  
苦酌泉飲之即狂也 拾遺記日南之南有淫泉之浦  
言其水浸淫從地而出成淵故曰淫泉或言此水甘軟  
男女飲之則淫其水小處可濫觴褰涉大處可方舟浴  
汭隨流曲直其水激石之聲似人之歌笑聞者令人淫  
動故俗為淫泉 隋圖經 潯發水今俗亦名妒女泉大

如車輪水色青碧婦人不得艷粧衣新綵臨之必興雨  
電故名

湯泉 研北雜志湯泉知名者七所謂匡廬汝水尉氏  
驪山鳳翔之駱谷和州之惠濟與渝州之陳氏山居也  
皆棄於窮山之中惟驪山當往來之衝華堂玉甃獨為  
勝絕燕之昌平李陵臺亦有溫泉 辛氏三秦記驪山  
泉舊云以三牲祭乃得入可以去疾涓病昔秦始皇與  
神女遊而忤其旨神女唾之則生瘡始皇怖謝神女為

出溫泉而洗除後人因以為驗 都穆遊名山記驪山在西安之臨潼縣出縣南半里即抵其麓經雷神殿東折門有綽楔榜曰溫泉池過此有室三楹啓其扇即溫泉也人呼為官池蓋非貴人不得浴此池四周甃石如玉環狀中一小石上鑿七竅泉由是出相傳甃石起秦始皇其後漢武帝復加修飾或云今之池後周天和中造又云唐玄宗廣之不能詳也官池之左有泉曰混池以浴小民 煮泉小品下有石流黃者發為溫泉在在

有之又有共出一壑半溫半冷者亦在在有之皆非食品特新安黃山朱砂湯泉可食圖經云黃山舊名黟山東峯下有朱砂湯泉可點茗春色微紅此則自然之丹液也 唐子西遊湯泉記惠州過水北十餘里得白水山山行一里所得佛跡院院中涌二泉其東所謂湯泉其西雪如也二泉相去步武間而東泉熱甚殆不可觸指以西泉解之然後調適可浴 荊州記新陽縣惠澤中有溫泉冬月未至數里遙望白氣浮蒸如烟上下乘

映狀如綺疏又有車輪隻轆形世傳昔有玉女乘車自  
投此泉今人時見女子姿儀光麗往來倏忽 周景式  
廬山記主簿山在胡郎廟前數里山下有溫泉穴口周  
圍一丈許涌出如湯沸冬夏恒熱 袁山松宜都山川  
記佷山縣有溫泉注大溪夏纔熱冬則大熱上常有霧  
氣百病久疾入此水多瘡 王韶之始興記靈水源有  
溫泉涌流如沸時有細赤魚出遊莫有獲者 丹鉛總  
錄東坡詩紀所經溫泉天下七處以驪山為最予在南



中所見又不止七處也寧州白崖德勝關浪穹宜良鄧川三泊凡數十處而安寧為最凡溫湯所在下必有硫黃其水猶有其味獨安寧清徹見底垢自浮去不積且無硫黃氣不知何理舊有人見竅出丹砂數粒乃知其下有丹砂徽州黃山溫泉亦類此蓋溫泉所在必白礬丹砂硫黃三物為之根乃蒸為暖流耳

瀑布 班固終南山賦旁吐飛瀨上挺修林立泉落落密陰沈沈註立泉謂瀑布 廬山記白水在黃龍南即

瀑布也水出山復挂流三四百丈飛湍林表望若懸素  
鴈宕志西谷龍湫如井狀檻中作凹石壁數仞水從  
凹中瀉下望之若懸布隨風作態遠近斜正變幻不一  
或如散珠如驟雨如飛雪如輕烟濛霧或飄轉中斷或  
左右飛散或直下如注雷或屈曲如蜿蜒觀者每立於  
潭外相去數十步水忽轉舞向人亂洒衣帽沾濕或大  
注如晴雷或為風所遏盤桓而不下皆奇態也 太平  
清話天下瀑布皆有聲惟鴈宕者無聲 五雜俎鴈蕩

瀑布無聲聞中水簾數處皆無聲蓋巖腰凹而水噴空  
則為水簾奇於瀑布 陳舜俞廬山記康王谷有水簾  
飛泉破巖而下者二三十派其廣七十餘尺其高不可  
計

水異 乾鑿度帝盛德之應洛水溫九日乃寒五日變  
為五色玄黃 天中記苻堅時長安有水影遠觀若水  
視地則見人至堅晚年而止宋文帝元嘉二十五年冬  
青州城南遠觀見地中如水有影謂之地鏡唐神龍二

年二月壬子洛陽城東七里地色如水樹木車馬歷歷見影漸移至都月餘乃滅長安街中往往見水影大厯末深州東鹿縣中有影長七八尺遙望見人馬往來如在水中及至前則不見水 宋史五行志紹興十四年樂平縣河決衝田水自起立如為物所吸聚為一直行高平地數尺不假隄防而水自行里南程氏家井水亦高數尺天矯如長虹聲如雷穿牆毀樓而出二水鬪於杉墩且前且卻約十餘刻乃解各復其故 說海貴州

普定衛有二水一曰滾塘寨一曰閘蛙池前後相近居人夜聞水聲搏激其響漸大開戶視之波濤噴面不可逼近及明聲息二水一涸一溢人以為水鬪 丹鉛錄正德中文安縣水忽僵立凍為冰柱高五丈四圍如之中空而旁有穴土人謂之河僵後數日流賊過文安鄉民入冰穴中避之賴以全者頗多

冰 周易履霜堅冰陰始凝也馴致其道至堅冰也

禮記孟冬之月水始冰地始凍仲冬之月冰益壯 風

俗通積冰曰凌冰壯曰凍冰流曰澌冰解曰泮 周禮

凌人掌冰正歲十有二月令斬冰三其凌

三倍其冰

春始治

鑑

鑑如甄大口以盛冰置食物於中以禦溫氣春而始治之為二月將獻羔而啓冰

祭祀共冰

鑑賓客共冰大喪共夷槃冰夏頒冰掌事秋刷

刷清也鄭司農

云刷除冰室當更內新冰

左傳申豐曰古者日在北陸而藏冰西

陸朝靚而出之其藏冰也深山窮谷固陰沍寒於是乎

取之其出之也朝之祿位賓食喪祭於是乎用之其藏

之也黑牡秬黍以享司寒其出之也桃弧棘矢以除其

災其出入也時食肉之祿冰皆與焉大夫命婦喪浴用  
冰祭寒而藏之獻羔而啓之公始用之火出而畢賦自  
命夫命婦至於老疾無不受冰山人取之縣人傳之輿  
人納之隸人藏之夫冰以風壯而以風出其藏之也周  
其用之也徧則冬無愆陽夏無伏陰春無淒風秋無苦  
雨雷出不震無災霜電癘疾不降民不夭札七月之卒  
章藏冰之道也 談苑收冰之法冬至前所收者堅而  
耐久冬至後所收者多不堅也黃河亦必以冬至前凍

合冬至後雖凍不復合矣 三輔黃圖建章宮積冰為樓 洞冥記漢武帝設甜水之冰以備沐濯 杜陽雜編唐順宗即位歲拘彌國貢常堅冰云其國有大凝山中有冰千年不釋及齋至京師潔冷如故雖盛暑赭日終不稍消嚼之即與中國者無異 鄴中記石季龍於冰井臺藏冰三伏之月以冰賜其大臣 天寶遺事楊氏子弟每至伏中取大冰琢成山週圍宴席間雖暑烈酒酣各有寒色甚且有挾纊者又令工人鑊冰為獸鳳



之形或飾以金環綵帶置之彫盤中送與王公大臣  
博物志削冰令圓舉以向日艾承其影則有火 盧氏  
雜說薄餅卷厚冰以刀切入迎刃而解 銷夏錄臨洮  
城外洮水冬月結冰小於芡實其圓如一富家收貯盛  
夏以蜜漿調之如真珠粉然 酉陽雜俎盛夏取大水  
晶如拳塊置釜中新汲水煮千沸以小口大肚餅盛湯  
以油綿密封其口勿令泄烝復以重湯煮餅千沸急沉  
井底平旦出之破餅冰已結矣 酉陽雜俎玻璃千歲

冰所化也 後山談叢世傳王祥卧冰求魚以養母至  
今沂水歲寒冰厚獨祥卧處闕而不合 神異經北方  
有石湖方千里深五丈餘歲常冰惟夏至前後五十六  
日解 漢書晁錯上書曰胡貉之地木皮三寸冰厚六  
尺 天中記周太祖乾祐中北征至澶州驛河水已解  
浮橋難立衆憂之其夜西北風裂凝凍比旦津吏報冰  
堅可渡步騎踐冰而行衆謂之凌橋日夕津吏報曰冰  
橋泮矣 雜俎開成末河陽黃魚池冰作花如纈 筆

談慶厯中京師集禧觀渠中冰皆成花果林木元豐末  
秀州人家屋瓦上冰亦成花每瓦一枝正如畫家所為  
折枝有大花如牡丹芍藥者細花如海棠萱草者皆有  
枝葉無毫髮不具雖巧筆不能為之以紙搨之無異石  
刻 金國志金末河水凍成龜文又有花卉禽獸之狀  
巧過雕鏤時人謂之天畫 韻府續編紹興八年汴京  
雨下冰龜數十里大小皆冰龜形具首足卦文 漢五  
行志今之長老名木冰為木介介者甲甲兵象也 七

修類藁木冰者雨及木而凝冰諺云木稼也洪範五行傳謂之木斤范氏謂之木介春秋成公十六年雨木冰文獻通考木冰者乃寒脇木而成冰妖不在木也冰花者乃冰有異而成花妖不在花也 撫遺唐開元冬至大雪簷溜皆為冰條妃子使侍兒敲二枝看玩帝問何物妃子笑曰妾所玩者冰筋也 酉陽雜俎王天運將四萬人征小勃律而還行數百里忽驚風四起雪花如翼風激小海水成冰柱起而復摧

冰斗冰鑑 博古圖冰斗有柄無銘三旁掩工其柄可  
持其底鏤空實冰斗也又冰鑑四足無銘上方如斗四  
傍塵鏤底作風窻承以大盤立之四足置食於上而設  
冰於盤使寒氣通徹以禦溫氣觀此鑑製作宜唐之精  
工所能到也

格致鏡原卷八

欽定四庫全書

格致鏡原卷九

大學士陳元龍撰

坤輿類

五

井

總論 周書黃帝始穿井 呂氏春秋伯益作井 淮

南子伯益作井而龍登玄雲神棲崑崙崙註龍恐害故登  
雲去棲其神於崑崙也 白六帖神農造井井有九所  
汲一井餘井悉動在鄧州 河渠書武帝鑿井深四十

餘丈往往為井井下相通行水 續漢書夏至日浚井

改水 白虎通冬祭井井者水之生藏在地中冬亦水

王萬物伏藏 易傳井通也物所通用也 風俗通井

者法也節也言法制居人令節其飲食無窮極也 初

學記久不滌滌為井泥不停汚曰井滌音洩滌井曰浚井

水清曰冽 爾雅井一有水一無水為灇音洩灇井曰浚井

云天井夏有水冬無水即此類也 戴侗六書故胥眸

子枯陷也井枯無水亦謂之胥井左傳宣十二年楚莊



王圍蕭蕭還無社謂楚申叔展曰目於胥井而出之  
演繁露鮑照井謎曰一八五八飛泉仰流飛泉仰流也  
者垂綆取水而上之故曰仰流也一八者井字八角也  
五八者析井字而四之則其字為十者四也四十即五  
八也 玉厯凡欲穿井處於夜氣清明時置水數盆於  
其地看何盆星光最大而明定必有甘泉 五雜俎凡  
出師遇深山無泉之處掘井一二丈不得水者可束蘊  
火薰之而密覆其上火烟不得出必尋泉脉隙處潛通

即他山數里外泉皆能引而致之烟通則泉流矣 煮  
泉小品井味鹹色綠者其源通海舊云東風時鑿井則  
通海脉理或然也 陸樹聲清暑筆談晨起取井水新  
汲者傳淨器中熟數沸徐啜徐漱以意下之謂之真一  
飲子蓋天一生水人夜氣生於子平旦穀氣未受胃臟  
冲虛服之能蠲宿滯痰滲以滋化源 潘自牧紀纂淵  
海井上種桃花落井不祥 葛洪方深井多有毒氣五  
月五日以雞毛試投井中毛直下無毒若迴四邊不可

入 楊慎外集余嘗侍先人知汝州見州治諸井皆以  
夾錫錢鎮之每井率數十千問其故一老兵曰此邦饒  
風沙沙入井中人飲之則成癭夾錫錢所以制沙土也  
南史梁普通二年始平郡石鼓村地自開成井方六  
尺六寸深三十二丈 異苑謝晦宅南路上有古井以  
元嘉二年汲者忽見三龍甚分明行道往觀莫不嗟異  
有人入井始知是塹隱起作龍形 吳均齊春秋齊荆  
州城東天子井出錦於時士女取用與常錦不異經月

乃歌 緝柳編少昊母皇娥宮側有井曰盤靈帝與皇  
娥宴於宮帝子命江妃歌冲景旋歸之曲盤靈之神吹  
簫以和之故至今號井神曰吹簫女子 酉陽雜俎井  
鬼名瓊 白澤圖故井之精曰觀狀如美女以其名呼  
之即去 初學記井甃聚磚修井也 顏師古漢書注  
井幹者井上木欄也其形或四角或八角 王鳳稜名  
物通銀牀井欄也古詩後園鑿井銀作牀金鉶素綆汲  
寒漿 水經注華林園中有古井悉以珉玉為之續石

為口工作精密 魚豢魏略明帝九龍殿前為玉井綺  
欄 伽藍記河間王琛置玉井金幹以五色縷為繩  
唐書王鉷以寶鈿為井幹 五代史補高郁用銀葉護  
井其四方內外皆然謂之拓裏 庶物異名疏梁元帝  
文玉臯不汲而銀甕滿玉臯井上桔槔也 說文轆轤  
井上圓轉木收綆者也

諸井 博物志火井一所縱廣五尺深二三丈在蜀郡  
者時以竹板木投之以取火諸葛丞相往觀後而火轉

盛熱以盆著井上煮鹽得鹽後人以家燭火投井中即滅息至今不復然也 楊升菴集火井在蜀之臨邛今嘉定地有之其泉皆油熱之則燃人取為燈燭 邵國志連渾府遙火山西有火井深不可見底炎氣上升常若微電以草爨之則烟騰火發故名熒臺 春秋潛潭巴火從井出有賢士從人起 水經注銅雀臺北曰冰井臺高八丈上有冰室有數井深十五丈藏冰及石墨焉 元和志有一泉水名曰沙井綿歷古今沙填不滿

水極甘美 嵩山記少室山有雲母井出雲母 羊頭  
山記月支有井色如酒因名酒井 廣志臨邛有粉井  
得水汰粉則益光 漢書蜀多鹽井 郭氏玄中記東  
方有柴都焉在齊國之山山有井深不測至春夏時電  
從井中出出則敗五穀人常以柴塞之不塞則電為患  
故號柴都 洞冥記長安東七萬里有雲山山頭有井  
雲從中出若土德王則黃雲出火德王則赤雲出水德  
王則黑雲出金德王則白雲出木德王則青雲出 安

成記羅霄山有石井天旱祠之以木投井中即雨至井  
溢木出雨乃止也 荊州記宜都有風井夏則風出冬  
則風入 南康記雩都盤固山其峯有井大銅人常守  
之五十年一涌水起數十丈銅人每以手掩之 拾遺  
記頻斯國有丹石井非人之所鑿下及漏泉水常沸涌  
中有白蛙兩翅常去來井上 後漢書東沃沮耆老說  
海中女國有神井視之輒生子 嶺表錄異綠珠井在  
白州雙角山下昔梁氏女有容貌石季倫以珍珠三斛



買之傳云飲此水者誕女多美麗閭里謂美色無益以  
巨石填之爾後生女雖端嚴形體不完採蘭雜志卓  
文君庭內有井文君手汲則甘香他人汲之與常井等  
至今尚存即文君井也廣州記鬱林郡有石井半甘  
半淡潛通江波冬夏常盈名曰司命井異物志廬陵  
城中有一井中有二色水半青半黃黃者灰汁取作糜  
粥皆作金色土人名灰汁為金因名金井南史昇明  
二年冬延陵縣季子廟之北忽聞金石聲疑其異鑿深

三尺得沸井奔湧若浪其地又響即復鑿之復得一井  
涌沸亦然井中得一木簡長一尺廣二分上有隱起字  
曰廬山道人張陵再拜詣闕起居簡文堅白字色乃黃  
瑞應圖云浪井不鑿自成王者清靜則仙人主之 演  
繁露陳後主入景陽井隋軍出之因號其井為辱井井  
口石欄有鐫字曰辱井在斯可不戒哉其石理光瑩可  
鑑仍有淡紅漫布其上略如朝霞建康圖經謂此之紅  
者乃張孔二宮人脂澤所染也 酉陽雜俎景公寺前

街中舊有巨井俗呼為八角井唐元和初有公主夏中  
過見百姓方汲令從婢以銀稜碗就井承水誤墜碗經  
月餘碗出於渭河元氏掖庭記有龍泉井瑪瑙石為  
井牀雨花臺石為井甃香檀為蓋離朱錦為索雲母石  
為汲餅

### 橋

王應麟玉海古者辰角見而雨畢則除道天根見而水  
涸則成梁者造舟為之未有橋之名也朱弁橋記造

舟為梁見於詩而杠榱倚約雜出於子史若橋之為名則始于商而獨著於周書逮秦漢乃各冠以地或因水而稱 三輔黃圖橫橋以象牽牛 說文橋水梁也榱水上橫木所以度也亦曰約今謂之畧約東楚謂橋為圮 詩大雅造舟為梁注造至也謂從舟至舟相編為橋即今浮橋 廣志獨木橋曰榱 爾雅疏隄一名梁 一云即橋也以木為之一云以石絕水石杠一名倚聚石水中以為步渡約也廣雅云倚步橋也或曰今之石

橋一石絕水者為梁 名物攷說文云石砭石橋也俗作杠從木十月成津梁則梁為在津之橋梁也今云輿梁者蓋橋上橫架之板若車輿者故謂之輿 山堂肆考繩橋以竹索為橋駕虛而渡名曰繩橋又曰竿橋

李膺竿橋贊複引一索飛絙杙閣其名曰竿人懸半空渡彼絕壑 詞林海錯太公六韜天浮鐵螂用以飛江謂飛橋也 段國沙州記吐谷渾於河上作橋謂之河厲長一百五十步勾欄甚嚴飾 事始橋上級謂之鴈

齒 雜志橋柱下橫木入沙中者謂之蹲鴟 晉書成  
都王穎屯河南阻清水為壘造浮橋以通河北以木函  
盛石沈之以繫橋名曰石鼈 漢文帝紀誹謗之木注  
服虔曰堯作之橋梁交午柱頭也應劭曰橋梁邊板所  
以書政治之愆失也 啓蒙記注天台山去天不遠路  
猶溪溪水險清冷前有石橋路徑不盈尺數千丈下臨  
絕冥之澗唯忘其身然後能濟 三齊要略秦皇於海  
中作石橋非人功所建海神為之豎柱 三輔舊事秦

造橫橋漢承秦制廣六丈三百八十步置都水令以掌  
之號為石柱橋 三輔黃圖秦始皇造渭橋重不能勝  
乃刻石作力士孟賁等像祭之乃可動 夷堅續志趙  
州石橋為魯班手造極為堅固意謂今古無第二橋矣  
有張神乘驢過橋動欲傾魯班在下以兩手托定而堅  
如初至今橋上有張神乘驢痕橋下有魯班兩手托迹  
朝野僉載趙州石橋甚工磨礪密緻如削焉望之如  
初日出雲長虹飲澗上有勾欄皆石也勾欄竝有石獅

子龍朔年中高麗謀者盜二獅子去後復募匠修之莫能相類者至天后大足年默啜破趙定州賊欲南過至石橋馬跪地不進但見一青龍卧橋上奮迅而怒賊乃遁去 泉南雜志泉州萬安渡洛陽橋案址于淵醜水為四十七道梁空以行其長三千六百尺廣丈有五尺翼以扶欄如其長之數又盤光橋自洛陽橋東接鳳嶼嶼在江中央上多腴田稠民居舊有石路潮落路出行者病之宋寶祐中僧道詢募貲作石橋長四百餘丈廣



一丈六尺比蔡端明所造洛陽橋長多四百餘尺闊多  
一尺世知洛陽而不知盤光者蓋以人重也 因話錄  
尚書省東南隅通衢有小橋相目為拗項橋言侍御史  
及殿中久次者至此必拗項南望南宮也 開元遺事  
長安東灞陵有橋來迎去送皆至此地為離別之地故  
人呼之為銷魂橋也 初學記注上方有鬼橋陝城有  
鴨橋 合璧事類杜重威朔州人契丹寇鎮定重威用  
三脚木為橋過河擊賊 事物紺珠壕橋橋以壕為準

下施兩巨輪推入壕輪陷則橋平可渡又摺疊橋壕闊用之兩橋相接中施轉軸

城

羅泌路史史記言黃帝為五城軒轅本紀言黃帝築城邑而汜勝之書記神農之教雖有石城湯池帶甲百萬然而無梁則不能守也是炎黃已城池矣石城之制既自神農則土城之作有不自伏羲乎初學記淮南子鮌作城吳越春秋曰鮌築城以衛君造郭以守民此城

郭之始也 博物志禹作城疆者攻弱者守敵者戰城郭

自禹始也 月令孟秋之月補城郭仲秋之月築城郭

左傳三堵為雉長三丈高一尺 公羊傳方丈而堵

又五板而堵五堵而雉百雉而城 考工記城隅九雉

以為都城之制 五經異義天子之城高九仞公侯七

仞伯五仞子男三仞 公羊傳注天子之城千雉高七

雉公侯百雉高五雉子男五十雉高三雉 春秋說文

天子周城諸侯軒城軒城者缺南面以受過也 白虎

通天子曰崇城言崇高也諸侯曰干城言不敢自專禦  
於天子也興地提綱城為保民為之也城之制三堵  
曰雉長三丈而高一丈也城上垣曰堞樓曰麗譙下門  
曰譙門無覆屋曰櫓城外河曰池池無水曰隍城之小  
者曰堡或曰郭曰壘有軍屯處曰壁釋名城盛也盛  
受國都也郭廓也廓落在城外也風俗通郭或謂之  
郭郭者亦大也釋名方城上垣謂之睥睨言於孔中  
睥睨非常也亦曰睥言睥助城之高也亦曰女牆言其

卑小比之於城若女子之於丈夫也 唐書馬燧傳設  
一門為譙櫓注櫓城上守禦樓 三輔黃圖長安城南  
為南斗形北為北斗形至今人呼漢舊京為斗城 崔  
豹古今注秦所築長城土色皆紫 吳地記吳羅城作  
亞字形 南史梁武帝攻郢城夜郢城有數百毛人踰  
堞且泣因投黃鵠磯蓋城之精也 梁四公記扶桑王  
宮內有水精城天未曉而明如晝城忽不見其月便蝕  
大志經大意初入海中至白銀城次至黃金城次至

水精城次至琉璃城龍王各與明月珠

墓附碑華表

名義考古者墓而不墳墳土起也亦謂之封封土陪益也檀弓若堂若防若覆夏屋若斧皆封之形也四周而平曰堂長而如隄曰防如大俎而垂曰覆夏屋反而上銳曰斧亦曰馬鬣今亦多類是白虎通天子墳高三仞樹以松諸侯半之樹以栢大夫八尺樹以欒士四尺樹以槐庶人無墳樹以楊柳公羊傳宰工之木拱矣

汪宰冢也 楊慎外集國語管仲曰定民之居成民之事陵為之終是民之墓亦稱陵也周顯王三十四年趙起壽陵秦惠文王以後始稱陵而民不得稱 漢書注壽藏謂冢墳也稱壽者取其久遠之意 後漢中山王傳墓門前開道建石柱為梁乃謂之神道 西京雜記羨門蓋冢中之門 物原伊尹始造墓宮 災輟子秦漢以來帝王陵前有石麟石象辟邪石馬之屬人臣墓前石虎石羊石人石柱之類皆以飾壠如生前之儀衛

五雜組自周以後始有堪輿之說然皆用之建都邑耳如書所謂達觀于新邑營卜瀝澗之東西詩所謂考卜維王宅是鎬京者而葬之求吉地則自秦檮里始然漢時尚不甚談至郭璞始以其術顯廣博物志墓銘或謂晉以前無有顏延年始為其制按吳志凌統卒權聞流涕使張承作銘誄則是三國時事也又漢西都時南宮寢殿內有醇儒王史長銘漢杜子夏臨終作文命刊石埋墳前廣博物志齊武帝欲為裴后立石誌墓



中王儉以為非古或以為宋元嘉中顏延之為王球作墓誌有銘自宋始隋得王戎墓銘為自晉始亦非是今世有崔子玉書張衡墓銘則墓有銘自東漢有之白澤圖故廢墓之精名元狀如老役夫操杵好舂呼之使人宜禾穀水經注六安縣故咎陶國也夏禹封其少子奉其祀今縣都陂中有大冢民傳曰公琴者即皋陶冢也楚人謂冢為琴述異記闔閭墓中石銘云吳王之夜室也雜記夏侯嬰封滕公嘗至東都門馬悲鳴

踏地不前使人掘之得石櫛一枚皆科斗書以今文寫之曰佳城鬱鬱三千年見白日吁嗟滕公居此室 舊唐書天寶十一載六月閩鄉縣黃河中女媧墓因大雨晦冥失所在至乾元二年六月瀕河人聞有風雷曉見其墓湧出下有巨石上有雙柳時號風陵堆 春明退朝錄唐內人墓謂之宮人斜四仲遣使者祭之 唐書姚勗自作壽藏於萬安山南原署兆曰寂居穴墳曰復真堂剝土為牀曰化臺而刻石告後世 路史於藍田

得尊盧之塚於衡山得祝融之窟於長安得陰康之冢  
於肺山得華胥之封於峨嵋得黃帝之款於雍得帝鴻  
之塋於雲陽得少昊之塋於城陽得慶都之塋於陳倉  
得娥眉之塋於商於得女英之塋

碑 劉熙逸雅碑被也此本王莽時所設也施其轆轤  
以繩被其上以引棺也臣子追述君父之功美以書其  
上後人因焉故每建於道陌之頭顯見之處名其文就  
謂之碑也 歐陽修集古錄後漢以後始有碑文欲求

前漢時碑碣不可得是則冢墓碑自後漢以來始有也  
物原晉武帝始置神道碑 禮祭儀麗於碑註君牽

牲入廟門繫著中庭碑也 李綽尚書故實古碑皆有

圓空孔音蓋碑者悲也本墟墓間物每一墓有四焉初葬

穿繩於空以下棺乃古懸窆之禮禮曰公室視豐碑三

家視桓楹人因就紀其德由是遂有碑表數十年前有

樹德政碑亦設圓空不知根本甚矣後有悟之者遂改

焉 宋祁筆記碑者施於墓則下棺施於廟則繫牲古

人因刻文其上今佛寺揭大石鏤文士大夫皆題曰碑  
銘何也 名義考今世所謂碑古無之七十二家封禪  
言勒石穆天子傳言為名迹於弁茲石上可見者惟此  
而已士昏禮入門當碑揖則廟內之碑用以麗牲者喪  
大記天子用大木為碑謂之豐碑諸侯樹兩大木謂之  
桓楹檀弓注天子六繹四碑諸侯四繹二碑士二繹無  
碑則方上之碑用以下棺者臣子因於其上紀述功德  
今廟堂墓隧及諸創建碑林立而不知非古也 後漢

書方者為碑圓者為碣 研北雜志北碑刻深謂之溝  
道 唐六典五品以上立碑螭首龜趺趺上高不過九  
尺七品以上立碑圭首方趺趺上不過四尺若隱淪道  
素孝義著聞雖不仕亦立碣金石例三品以上神道碑  
五品以下不銘碑謂之墓碣 明會典五品以上許用  
碑六品以下許用碣庶人止用壙誌公侯及一品碑螭  
首龜趺二品碑蓋用麒麟三品碑蓋用天祿辟邪竝龜  
趺四品以下竝圓首方趺高低各有尺寸 洛中紀異

絳州龍興宮有碧落碑碑文成而未刻有二道士來請  
刻閉戶三日不聞人聲人怪而破戶有二白鴿飛去而  
篆刻宛然 珍珠船第殿側有魏泉堂碑其石瑩徹宮  
中號玻璃碑 羣碎錄宋太宗立郡國戒碑爾俸爾祿  
民膏民脂下民易虐上天難欺乃景煥野人閒語書中  
語也又云摘蜀王孟昶之文按歐陽集古錄戒碑起唐  
明皇特不見其詞耳又云宋高宗頌是黃庭堅書 魏  
志繁昌縣授禪石碑中生金表送上羣臣盡賀 王隱

晉書永嘉初陳國項縣賈逵石碑中生金人盜鑿取賣  
賣已復生此江東之瑞也 晉書戴逵總角時取鷄卵  
汁溲白瓦屑作鄭玄碑復為文自鐫之詞麗器妙人皆  
驚異 李延壽北史秦王俊府僚佐請立碑帝曰欲求  
名一卷史書足矣何用碑為若子孫不能保家徒與人  
作鎮石耳

華表 物原周公始為華表 禮記公室視桓楹注桓  
墓前表柱也 說文桓亭郵表也徐鉉曰表雙立為桓



今郵亭立木交於其端或謂之華表 集韻牴牾二獸  
名秉心甚靈蓋忠直獸也今華表頂上者是 丹鉛錄  
華表漢書注作和表字林作桓表

格致鏡原卷九